



安徽通志

ル 5
1575
62



九三〇五
1575
62



重修安徽通志卷一百八十四

人物志

宦績 七

徽州府

李時字惟中休甯舉人歷嚴州府通判常例一無所入海甯患海潮累隄不就上官以屬時齋沐虔禱踰月而成升本府同知

民樹碑志感 徽州府志

汪齊民字以成婺源舉人知安仁縣時有亂民稱兵當道委捕之齊民單舸往寇以兵來不為動以酒餽進飲食之不疑遂感

動降 徽州府志

謝溥字公濟祁門舉人知長汀縣裁冗費革例錢王守仁剿武平挂阮象洞檄溥轉餉有功長汀入祀之名宦 一統志福建名宦

汪璽婺源人宏治中知武昌縣歲旱虔禱以勞卒官嘉靖中建鳳臺書院祀之一統志湖北名宦

方進婺源人宏治末任崇仁縣寬嚴得體吏戢民懷尤精藻鑑

正德丁卯鄉試豫製匾額三曰今科領薦必劉最劉寯與周禧

也榜發果如其言江西通志新增

余瑩字宗器婺源舉人知廣昌縣盜賊屏息流移來歸宸濠叛

王守仁移檄討之瑩振旅戰於江斬五百餘級祀廣昌名宦徽州府志

志

鄭冕字晦之祁門舉人爲曹州學正流賊入境率諸生守禦升

長沙府判益勵清節逋賦者爭先輸納轉馬湖同知討平芒部

叛蠻湖南通志

潘鑑字希古婺源人正德戊辰進士歷福建僉事平安南盜有

功累升右副都御史巡撫四川上時務四疏皆關切要改工部

左侍郎督採木事竣奏言湖廣川貴諸府民疲於採辦請量議

蠲復從之起撫兩廣以疾卒諡襄毅鑑性坦易不爲危言激論

而耿介卓立不可干以私治官如家恭勤潔白之操始終一致

一統志

程昌字時言祁門人正德戊辰進士知蘄水縣擢御史陳十事

率同官伏闕諫武宗南幸巡按福建討平南靖諸賊復巡廣東

殄滅新會新甯劇賊歷湖廣四川按察使致仕徽州府志

曹深字文淵歙縣人正德戊辰進士率同榜百餘人撫劉瑾逆

跡疏於朝罰跪午門五日以羸成疾授南兵部主事卒江南通志

金約字用博休甯舉人署唐縣教諭會流賊至乘城守禦矢中

項益奮激固守賊遞升國子監助教祀名宦江南通志

江一桂字伯馨婺源舉人知建甯縣制黠胥剝稅政建書院置學田民建祠與宋令趙紡夫並祀升南戶部主事出守太平壤接交趾時莫登庸蠢動毛伯溫奉命征之計先遣使往諭一桂請行登庸乃稱臣築受降城建昭德臺於鎮南關以壯邊防進階亞中大夫及卒諸夷創桄榔祠於關內祀焉一統志福建名宦廣西通志

汪瓚歙縣人正德三年知興甯縣十五年復任建申明旌善二亭先是賊劫縣治瓚被劾及復任歡動一邑湖南通志

舒泰婺源人正德中授武岡州同知民黠難治泰撫以忠誠皆悅服藩府官校需索不肯阿徇被讒求去民涕泣祈留不得遂致仕歸湖南通志

張士鎬字景周歙縣人正德辛未進士授大理寺評事武宗南巡抗疏諫廷杖謫南刑部照磨後官終浙江副使徽州府志

汪元錫字天啟婺源人正德辛未進士授給事中三遷都給事中陝西鎮守中官廖鸞族子鎧冒功為錦衣千戶隨鸞於陝元錫疏劾徵還偏頭關之捷錄功太濫疏劾太監張忠總兵官劉暉等不宜賞帝幸昌平大同宣府及幸喜峯口皆抗疏諫帝將親征宸濠復諫阻及濠就執偕六科馳疏請回鑾帝在南京復申前請語極危切世宗即位首劾郭鼐等十人皆江彬黨宜下獄治從之帝以李福達獄下三法司於理元錫不能平有後言張璠以聞并下獄奪職後起故官歷左右侍郎致仕卒明史本傳
唐濂字景之歙縣人正德辛未進士授太常博士擢御史章累百上指切時病權要無所撓巡按江西先是居臺時密疏宸濠異謀至是聞命兼程赴官中途聞母訃不果行卒於家徽州府志
葉天球字良器婺源人正德甲戌進士授戶部主事監倉居庸

關武宗駕突至天球伏謁疏請回鑾出知東昌府行常平法積粟數萬立團甲籍民丁出入莫敢為奸因州縣瘠沃差三等以均徭役歲饑設法賑濟流民并籍記安插全活二萬人歷官四川右參政卒子份嘉靖癸未進士授刑部主事奪武定侯郭勛所占中官園地還其人擢山東提學僉事裁抑浮競以正士習

徽州府志

鄭佐字時夫歙縣人正德甲戌進士授刑部主事數決疑獄改禮部議立朱子後博士佐有力焉嘉靖初以議禮事極陳清甯宮後殿災變之由出為福建僉事備兵饒州前後誅閩饒宿寇升江西參政徙貴州乞歸江西通志徽州府志
胡松字茂卿績溪人正德甲戌進士授嘉興推官擢御史首劾錢甯等為宸濠黨請罷監寺臨清市店又論東廠宜裁疏薦謝

遷韓文等以忤罷嘉靖初起故官以論桂萼引用江彬黨王瓊忤旨謫廉州推官歷升右副都御史上治河便漕疏晉工部尙書伊王欲拓府地賄嚴嵩期必得松據祖制爭乃止俺答入寇仇鸞以邊眾入衛欲悉其眾實京師移武庫仗於營便給調松力陳不可弗許尋移疾歸卒年八十三明史本傳江南通志

黃文光字應奎休甯舉人知冠縣冠俗好訟文光勤於化導訟漸簡使者行部持倉庫吏責私簿典庫曰官無一錢出入簿安得來使驚異江南通志

趙時勉字誠之歙縣舉人謁選上時務二十事知武城縣歲饑民流力請監司疏蠲民租之半省廚傳費歲數千緡祀名宦江南通志

方紀達字行可歙縣人正德丁丑進士知南豐襄陽二縣擢南

給事中張璫桂萼用事抗章詆之出為廣西僉事值田甯用兵之後出謀發慮動合機宜如思恩之遷荒田隆安之不屬田州皆有力焉以艱去民至今德之廣西通志

程資字仲朴婺源人正德丁丑進士授溫州府推官郡有黃洲埭為永瑞二邑水利關鍵適隄圯河決資率士民成之呼為程公埭補台州歲饑請於郡守捐租賑之歷升雲南參政歸徽州府志

汪思字德之婺源人正德丁丑進士選庶吉士改給事中嘉靖中首薦耆舊石瑤韓文等以輔新政極論太監崔文鮑忠芮賢之罪薦尚書林俊之忠力救諫臣劉最讜論重一時未幾論劾

戴功為外戚議封思奏此必有大臣貪天功為己力者議遂寢出為廣東參議擢雲南副使歸江南通志

胡宗明字汝誠績溪人正德丁丑進士授戶部主事甘肅邊警

督餉有功進四川參議移廣東劇盜充斥設奇俘馘而還歷福建參政漳泉諸郡早穀價湧騰白直指使者改折民賴焉調陝西平黎有功進雲南山東布政使升副都御史巡撫遼東增築屯堡多做古遺法江南通志

江元輔字堯卿婺源人正德丁丑進士知新喻縣以從王守仁平甯藩功升戶部主事士民攀留繪像祀名宦歷升郎中監督

徐倉卒於公署徽州府志

潘鑑字希平婺源人正德辛巳進士授戶部主事監北新關罷鎮守無名之需鈔額告溢則盡蠲小稅歸其羨於司農歷郎中

革部中白直三百人宿蠹一清出知長沙府搜剔奸弊案無滯牘修郡志新學宮號稱幹濟累官河南左參政湖南通志

程輅字邦載績溪人正德辛巳進士歷官給事中上六事曰慎徽州府志

錫予杜奸欺核軍功累年勞限因革清詭冒武弁應革者盡革去坐救安盤劾郭勛削籍後復官

江南通志 徽州府志

潘潢字薦叔婺源人正德辛巳進士知樂清縣為治務漸民於孝義以經術相劇入為禮部郎進大學衍義勸經筵御講改吏部前後章數十上皆切至署選事冢宰欲私二人潢不從左遷禮部督學閩中搜市肆壞教書焚之立輔仁紀業二冊講明正學歷遷至戶部尚書與嚴嵩忤以議條例不合上疏自劾徙南工吏兵三部尚書告歸潢貌不踰中人而守道守官萬夫莫抗居常恂恂如不出口至矢謨慷慨必盡所懷卒諡簡肅

一統志

唐仕字信之歙縣舉人知福安縣俗故簡陋好禳祥仕首葺學宮銷元武銅像為文廟禮器廢白蓮禪堂為書院射圃創醫學藥局行之三年風俗頓革遷景州守乞養歸

徽州府志

江軾字子敬婺源舉人判紹興築外堰捍海潮禹陵地為豪所侵毅然復之擢知連州獍民嘯聚剽掠單騎抵巢諭下之以父疾歸遂不出

徽州府志

方廷璽字信之歙縣舉人知山陰縣地近海埭聞蓄洩不時為民患廷璽立石閘榷海口並山為隄益注填闕之水以溉鹵地旱蝗禱於神蝗不為災

徽州府志

汪瑄婺源人嘉靖初知長樂縣值洊饑多方賑卹躬控監司旬為發倉都守汪文盛遂與瑄共疏以聞詔蠲其租民歌曰天降殃歲卒荒不有二汪誰立我僵

福建通志

許瑄字伯和歙縣人嘉靖癸未進士福建興化知府持官廉正督學使者校士峭刻瑄數為諸生請諸生無不蒲伏謝期年以憂解任往弔者數千人

福建通志 新增

程旦字孟明歙縣人嘉靖癸未進士授戶部主事歷升雲南按察使考驗土官楊訓陶炳獄立結其罪時議征安南陳十餘事

徽州府志

多中機宜升浙江布政苗民號泣攀車追送
方升字世猷婺源人嘉靖癸未進士知永嘉縣刷弊政制豪強以禮整俗吏胥有犯不少貸張璉語其鄉人曰方令鐵漢勿犯也累官福建副使卒以直道忤上官歸

溫州府志 徽州府志

方遠宜字伯時歙縣人嘉靖癸未進士歷知青田縣歲饑請發廩弛禁擢御史以忤權相左遷累升湖廣參議營繕顯陵奏省東南綱費千萬備兵鄜州與曾銑議復河套銑得罪忌者并中之以苑馬寺卿歸青田人祀之學宮

徽州府志

汪仲成字汝玉績溪人嘉靖丙戌進士授南大理評事有巨璫從子殺人賂問官求脫仲成不從竟抵法轉右寺正條陳八事

遷思恩知府時土官岑濬以叛誅其子岑金攻城仲成以計縛之改柵州乘臘夜襲誅劇賊韋扶諫建駕鶴書院以育諸生柵船稅歲千金悉委縣收貯以備軍餉又改程番府敷歷三郡清

介如一日

江南通志 徽州府志

戴嘉猷字猷之績溪人嘉靖丙戌進士知烏程縣賦繁重為上於朝乞均之置義田數百畝徵穀構學舍課諸生升給事中以言事廷杖謫桂林尉遷高州府同知署雷州府事蠲舟稅增設石閘以護新城升四川僉事獲私茶金巨萬以築馬湖城升湖廣參議久旱民苦令貪劾去之兩大注晉浙江巡海副使卒

於官

統志廣東名宦 浙江通志

汪大受字叔可婺源人嘉靖己丑進士選庶吉士改工部主事權稅杭關開貼沙河以便商商人祀之遷郎中出為廣西僉事

歷升福建參政平劇賊鐵古等巢有功以副都御史巡撫湖廣
歲饑親往巡問發廩賑給蠲租停徵活饑民二十七萬顯陵工
興計費百萬多方區畫精稽裁汰迄成費止四十萬倭寇東南
徵楚兵檄副使熊某往熊恃首輔嫺稱疾不行乃別遣將領兵
論熊避事忤相意遂歸徽州府志

鮑象賢字復之歙縣人嘉靖己丑進士授御史歷官雲南副使
毛伯溫討安南檄雲南巡撫汪文盛會師以象賢領中哨象賢
言剿不如撫文盛然之卒如其言遷右副都御史巡撫陝西移
撫雲南集土漢兵七萬討沅江賊那鑑鑑仰藥死遷兵部右侍
郎總督兩廣軍務討平海賊徐銓又擣廣西賊黃父將巢大獲
入佐南京兵部被劾歸起太僕卿復以右副都御史巡撫山東
召拜兵部左侍郎年老引去卒贈工部尚書明史毛伯溫傳

程烈字惟光歙縣人嘉靖己丑進士除工部主事榷木於杭杭
鎮守中官歲出數十金付關僧和市實鉤取之誅求數倍烈列
其狀於部自是斂跡徽州府志

侯嘉晏徽州舉人嘉靖閒知石樓縣御民以寬不喜事敲撲民
胥安之嘗為歌稱其儉約廉仁能福庇斯民後擢河南府通判

山西通志
新增

鄭恭字子安績溪人嘉靖己丑進士知黃巖縣擒海寇疏河道
歷升樂平知府蠻攻阿村恭部勒民兵突赴之驚遁去以艱歸
起補卽墨民多逋賦恭請一切蠲之調大理土官木氏阿氏構
兵彌年不能禁恭為解之徽州府志

張全婺源人嘉靖中由舉人歷知雅州多惠政民謠曰急流下
有深灘劉澤後有張全祀名宦祠四川通志
新增

黃福字子謙休甯人嘉靖己丑進士授兵部主事升武選司郎中司禮監為從子乞錦衣百戶旨下福執奏不予凡錦衣有罪負緣漸復者福盡裁之遷福建參議以部事註誤謫判饒州尋遷浙江僉事開城河疏湘湖升湖廣參議卒徽州府志

方舟婺源人嘉靖己丑進士知富陽縣以文學飾吏治修學宮及縣志建觀山鐘樓人文興起浙江通志

黃鏜字德鳴歙縣舉人知蘭溪縣擢御史奉敕行邊時武定侯郭勛驕橫撫臣張漢師失律鏜將糾之為二人先事中傷謫浙江按察司知事浙有泌湖為豪所占鏜復之官被利者數邑遷濱州知州歲饑民流請蠲逋減額躬行阡陌相勞苦民感動復業濱人祀之升南刑部郎中卒徽州府志
舒遷字于喬黟縣人嘉靖乙未進士授行人都御史歐陽鐸欲

增山稅遷力止之擢御史著居官慎己二銘按山西清理鹽課

羨餘悉奏賑邊又按廣東翦豪暴黜貪汙所至有聲江南通志

胡文彬字仲質績溪選貢授嚴州通判清苦自勵淳安礦賊為

亂以至誠諭之皆感泣歸農權稅北關總攝鹽政皆以廉節自

持浙江通志

陳有容字仁甫休甯舉人知歸德州有羨金二千舍人以為言

正色卻之終瑞州同知徽州府志

汪佐字汝賢歙縣舉人授南昌推官廉介不苟遷九江同知會

南昌水民叩部使請畱乃捐俸為倡以賑民忘其災徽州府志

程達字時望婺源人同知衢州府恬靜寡欲禮士愛民視篆龍

游儲積獨廣拯開化之溺全活者眾浙江通志

程鐸字子木歙縣舉人授廣州同知承檄鉤校韶州計簿韶藏

有無名錢萬餘緡或以陷鐸不聽為疏其始末立法以杜侵牟

徽州府志

汪鯨字時躍績溪舉人授保甯通判歲饑立法賑濟革猾吏均

徭役抑豪宦善政多可述

徽州府志

汪楠字良用婺源舉人知霑化縣歲旱蝗出令捕蝗一升者易

以斗米七日而蝗息

徽州府志

金用字九夫休甯舉人知翁源縣有治鑄者據山為民患單車

諭之遂散去郡命巡視海舶夷人皆感其惠扁其名與故盛令

同揭舶上升儋州同知卒於官

徽州府志

胡瓚字仲珪績溪人官新化州同知寇者索擁眾萬餘又有者

樂旬殺官奪印撫按委瓚招安裁制得宜計縛其魁民夷稱便

徽州府志

胡宗憲字汝貞績溪人嘉靖戊戌進士擢御史出按浙江時歙

人汪直據五島煽諸倭入寇而徐海陳東麻葉柘林乍浦川

沙窪日擾郡邑倭寇嘉興宗憲中以毒酒殺數百人超擢右僉

都御史進兵部右侍郎宗憲與汪直同鄉里欲誘降之釋其母

妻於獄遣客諭直直心動會徐海與陳東麻葉三路進兵攻乍

浦圍桐鄉以計閒之諭海縛陳東麻葉而別遣陳東書令圖海

故泄之海怒遂縛東來獻乘其黨攜圍之海投水死因次第俘

諸賊及海首以獻兩浙倭漸平加右都御史復以計誘汪直至

下之獄論死以功加太子太保後有劾其黨嚴嵩者逮至京帝

念其功曰宗憲非嵩黨今若加罪後誰為我任事者因得釋繼

又被劾下獄竟死萬歷初復官謚襄懋

明史本傳

鮑道明字行之歙縣人嘉靖戊戌進士歷官浙江按察使浙輻

湊之衝道明戒閹者母入鄉人謁母入關說者書即權豪面謁
欲有言曾不得啟齒積弊一清仕至南戶部尚書浙江通志

洪垣字峻之婺源人嘉靖壬辰進士知永康縣廉慎有才清稅
糧興水利嚴溺女及火葬之禁擢御史按視兩淮鹽政請蠲餘

鹽積逋銀百二十萬清核泰州民田與竈戶相錯使無侵冒在
臺七年疏數百上世宗每嘉納之稱為言官一人嘗劾文選郎

黃正貪婪欺妄帝下正詔獄令十三道御史公舉冒進得罪者
二十餘人明史本傳 徽州府志

潘絲字朝源婺源人浙東礦盜起掠婺入歙部使者強起絲大
破之超格薦授嚴州別駕權知分水縣縣喜訟絲條析縷解訟

漸稀丁多浮額民苦之鈎稽古牘去虛者千數三月而邑大治
移攝建德蠲歲徵八百有奇刊為額浙江通志

江文式字時憑婺源舉人知莘縣賊師尙詔攻掠城邑一日假
校尉帶數十騎過莘文式偵知為賊生擒之撫按上其功詔建

偉績坊江南通志
畢效欽字平仲歙縣舉人官南昌府通判時閩廣巨寇張蠻流

遯鄱陽湖請兵殲之徽州府志
鄭惟誠字伯明祁門人嘉靖辛丑進士授金華府推官擢給事

中出知長沙府聽訟明允校士精詳升陝西提學改廣東副使
與嚴嵩壻同官嘗樓飲嚴壻以酒迫之曰飲此立開府惟誠怒

推之下竟為所中罷歸湖南通志 徽州府志
汪埴字仲宏休甯人嘉靖甲辰進士授戶部主事轉員外郎時

修會典十三司皆埴總裁升福建兵備僉事分守福甯倭犯同
安埴釋重囚七人擊倭卻之捷聞擢參議明史董漢儒傳

江珍字民璞歙縣人嘉靖甲辰進士知高安縣擢禮部主事升廣信知府楚酋叛於閩佯歸浙督府珍策其必叛勒兵戒嚴酋乃轉掠他郡遷浙江參政會游民據銅山破婺源且掠歙急請發兵要其歸路殪之因錮銅山官終貴州左布政

徽州府志

殷正茂字養直歙縣人嘉靖丁未進士由行人選兵科給事中歷廣西雲南湖廣兵備副使遷江西按察使古田獐章銀豹黃朝猛反擢正茂右僉都御史巡撫廣西調兵討之遂斬朝猛捕銀豹磔諸京師遷提督兩廣軍務羣盜及倭為害正茂議守巡官畫地分守而徙瀕海謫戍之民於雲南川湖絕倭嚮導先後殺倭千餘以次削平諸盜累加兵部尚書兼右副都御史召為南戶部尚書改北部疏請節用諫止採買珠寶引疾致仕

明史本傳

汪道昆字伯玉歙縣人嘉靖丁未進士知義烏縣歷福建兵備

副使有悍卒擁脅巡撫道昆馳入軍門戮其首事一軍寂然倭陷興化全閩大震道昆走浙請胡宗憲檄戚繼光往平之升按察使晉右僉都御史巡撫福建與繼光討平大盜吳平復撫鄖陽召為兵部右侍郎轉左侍郎乞養歸道昆詩文比肩王李自攀龍歿與王世貞狎主齊盟稱南北兩司馬所著有太函集行於世

明史王世貞傳
徽州府志

程嗣功字汝懋歙縣人嘉靖丁未進士歷官浙江參議錦衣陸炳徒屬恣橫嚴治之升廣東右布政殷正茂征古田嗣功轉餉有功進南戶部侍郎

徽州府志

吳鎬字宗周績溪舉人知上猶縣捐俸置田以恤士之貧者強寇掠境斬其渠餘黨悉散升安州知州築隄防水散種助耕民德之

江南舊志

方若坤字子靜祁門舉人知桂平縣胥吏奸者不得逞為郡司

理所讒被劾桂人祠祀之

徽州府志

俞喬字子遷休甯舉人知大田縣縣新造興學育才與民更化有妨於地方者悉去之流賊薄城捍禦七晝夜出奇設伏敗走之卒於官民祠祀之

徽州府志

方宏靜字定之歙縣人嘉靖庚戌進士知東平州擢戶部員外郎出為江西副使饒州礦盜起部勒將卒示以必剿遣人招諭散其黨累擢右副都御史巡撫浙江胡宗憲新得罪水戰餘艘俱廢疏請增備禦倭得無警中飛語歸起補鄖陽遷南戶部右侍郎督糧儲歲饑月出倉粟給軍使無糴民間米價為平宏靜沈厚篤實居官介然有守卒贈工部尚書

一統志

程金字德良歙縣人嘉靖癸丑進士授南工部主事羨無所染

分司龍江關要人援權相勢撓關法金篋其船工於市後出守

長沙改漢陽發楚藩外屬奸賊二十萬張居正起私第託市木

金令自採試士以食稻衣錦為題遂投劾歸漢陽祀名宦

江南通志

方良曙字子賓歙縣人嘉靖癸丑進士授工部主事權木荊州

關吏兼請算舟不許額既足乃罷兩月告緡恤刑畿輔釋三冤

獄嘗做長垣故事治河河不為災升雲南布政使捐羨金以濬

昆明池溉民田又築晉甯州城晉應天府尹卒

江南通志

江一麟字仲文婺源人嘉靖癸丑進士知安吉州撫散礦賊擢

工部郎吳時來等以疏劾嚴嵩下獄一麟力救得免轉廣平知

府歲旱蝗徒步齋禱雨集蝗死擢監軍副使以討廣寇率俞大

猷等馘賊渠曾一本時倭寇海豐島賊陷電白皆次第削平擢

撫貴州苗酋葉楷負固為患設奇搗其巢請建為長甯縣晉都

御史兼戶部侍郎總督漕務卒賜祭葬江南通志

程廷策字汝揚休甯人嘉靖癸丑進士授戶部主事抗疏糾錦

衣陸炳侵冒邊餉進郎中壬戌分守都城申嚴約束出知辰州

持守清介以忤上官歸徽州府志

李叔和字介夫祁門人嘉靖癸丑進士由推官擢御史抗疏糾

邪出按遼東浙江風裁峻整以疏劾相臣擅權幾陷不測罷歸

徽州府志

程大賓字汝見歙縣人嘉靖丙辰進士授吏部主事時分南北

考察所殿最無不當擢廣西副使繕甲兵嚴巡緝境內肅然督

學滇南以母老歸徽州府志

吳文光字有明婺源舉人知應山縣錢糧令民自封投櫃景王

之國督檄旁午文光量為裁節境內晏然徽州府志

方用欵縣人嘉靖中知郴州加意學校以官邸易民塘引九曲

水入學宮建號舍置學田土豪其澤湖南通志

黃金休甯人嘉靖閒知松溪縣修城拓學復湛盧書院凡倉庾

橋梁廨署莫不葺治福建通志

何其賢休甯人嘉靖中知甯遠縣清介自持議減差役究心水

利士民德之湖南通志

李景欵縣人嘉靖中知沅州節費省刑愛民興學均州衛丁徭

請靖州幫貼衝疲之地百姓不受偏累西溪三蠻甘味苗叛景

出奇計討平之請築便冕二堡湖廣通志

胡晟婺源人嘉靖中知沅陵縣榮藩督租率為民害晟悉以法

繩之革辰沅夫役均民勞逸湖廣通志

汪如海字汝會黟縣人嘉靖己未進士時錦衣陸炳方貴寵欲

以女妻不從人服其操官刑曹辨孕婦之死釋參將之冤出守

九江巨寇柯日迪聞而投服府城一面當水累被水鬻捐俸築

庾樓磯護之遷河東陝西鹽運使徽州府志

程道東字震伯歙縣人嘉靖己未進士授工部主事奉詔營景

王宮室還治河有功歷知深州復以治海擢戶部郎中出為雲

南知府江南通志

凌瑄字惟和歙縣人嘉靖壬戌進士授南安府推官追殺巢賊

擒其渠魁擢御史遇諸璫不少為禮都御史路楷以黨嚴嵩殺

沈鍊下獄柄臣欲釋其罪瑄持不可直聲大振歷官陝西按察

使江南通志

李寅賓字于暘婺源人嘉靖壬戌進士知嘉興縣升南工部署

漕儀真中貴人銜命採香泛巨艘索夫數百辱及寅賓寅賓奮

然登舟請以上採者役民餘當屏中貴人懼夜遯去築學斯堂

漕事之暇聚多士講學其中以忤時歸徽州府志

余天爵字子修黟縣人由貢任廣信訓導三署縣事幹理有方

升知茂名縣辦軍餉戢獠蠻民樂輸將庭無畱獄江南通志

楊旦字明甫休甯舉人知奉化縣築天甯長沙二隄民無水患

倭至設伏敗之邑立生祠焉通判杭州革織例金三千緡轉青

州疏河運三月成功江南通志

許試字廷揚祁門舉人知將樂縣大治遷漳浦愛民好士廉潔

不徇干謁有古循良風江南通志

章淮字源豫績溪舉人授太平教諭嘗捐俸恤士之貧窶者升

長沙推官署善化瀏陽篆皆有惠政部使委查十三郡所至發

奸摘伏觸瘴死百姓哀之著全楚遺哀錄立祠祀焉徽州府志

程文著字美中婺源人嘉靖壬戌進士知永嘉縣政務寬簡以蘇民困升袁州知府萍鄉令坐支帑俸免官不能自辨文著察令素廉索支俸劄驗之立白其誣因成司藏者擢陝西苑馬寺

卿徽州府志

王京祥字用極祁門舉人知湘陰縣縣民逃賦曠京祥招復之裁夫役以當其賦單騎行村落課耕遇災荒賑恤如恐不及卒於官櫬歸泣送者載道

湖南通志

張澍字子汝婺源舉人知石門縣清土官侵占之田復之編戶調魚臺地瘠兼苦河決部使者督閘課工費甚亟他邑取辦民間澍獨檢庫藏得市稅千金舊例以充令公費者給之去之日兩涯泣送者數千人立祠以祀

徽州府志

汪萬和字一中黟縣舉人知桐鄉縣興學清賦招逋逃雪冤獄

有得釋者餽二千金毫無染指升膠州守

徽州府志

許國字維楨歙縣人嘉靖乙丑進士選庶吉士授檢討神宗為太子出閣兼校書及即位進右贊善充日講官歷位至文淵閣大學士太子太傅性木強數與言者為難士論不附然廉慎自守累遭攻擊不能被以污名以疏請建儲為帝所責乃乞休卒

贈太保諡文穆

明史本傳

游應乾字順之婺源人嘉靖乙丑進士授戶部主事改刑部歷郎中編次明律出守甯波濬陂塘通水利時郡邑承張居正指廢書院獨甯波存遷兩浙運使晉雲南按察平巨寇丁改有功轉廣東左右布政歲饑發廩且捐俸以賑歷位大理卿冤滯多所昭雪總督倉場先後條上四十餘事俱著為令卒贈尚書

通志

俞一貫字原心婺源人嘉靖乙丑進士知廬陵縣日咨王守仁遺政酌時宜而損益之邑民謠曰前伯安後新安稱二難以治行第一擢御史巡按山東上馬政疏決六郡聚訟之議引疾歸

徽州府志

許天贈字德夫黟縣人嘉靖乙丑進士知海甯縣奉檄丈田素精句股諸弊盡剔升戶部主事權北關以廉惠稱出守建甯疏古渠創建甯二衛遷兩浙長蘆鹽運使轉山東參政獄多平反卒之日遠近哀思之

浙江通志
江南通志

余一龍字汝化婺源人嘉靖乙丑進士知江山縣縣舊無城寇盜竊發一龍倡議城之俗負氣健鬪訓之以禮朔望聚講以敦倫睦族教諸生風俗丕變擢御史疏請東宮出學乞宥諫臣鄭履純出補湖廣僉事治兵沔陽平桐柏湖寇建閘築隄修四城

築三學累擢貴州副使殲叛苗歷四川左布政升南太僕卿謝

病歸

衢州府志
江南通志

汪文輝字德充婺源人嘉靖乙丑進士授工部主事改御史高拱以內閣掌吏部其門生多居言路日夜走其門專務搏擊文輝亦拱之門生心獨非之乃疏陳四事專責言官一曰傾陷二曰紛更三曰苛刻四曰求勝疏奏拱惡其刺己出為甯夏僉事修屯政蠲浮糧建水牯流亡漸歸御史孫丕揚忤拱為希旨者所劾方行勘文輝抗言曰毛舉細故齟齬正人不可為也於是緩其事丕揚獲免拱罷政召為尙寶卿尋告歸久之有詔召用未赴卒

明史本傳

胡文光黟縣舉人知萬載縣革宿弊擒巨賊決兩省疑獄築城垣修學校起養濟院立水次倉升膠州知州兼理海運遷荆王

重刊安徽通志卷之四
府長史乞養歸

徽州府志

江朝陽字儀卿婺源舉人知安鄉縣邑多水患築隄障之調孝
豐歲饑力為請賑時當履畝之役丈量公平監司頒行其法升
上思州知州思始改土為流庶事草創朝陽立倉庫修學宮雷
心教化習俗漸變升廣州府同知卒三地皆祀之

徽州府志

郭莊字子莊徽州人隆慶二年進士癸酉按蜀會多盜檄道府
剿治盜得息蜀府有所請於朝久沈閣莊為請得允王饋以金
御之品望益重

四川通志
新增

汪階歛縣人隆慶初官武岡學正刻冠婚喪祭鄉射諸禮以訓
士督學使者校士至郡檄舉射禮雍容如制以教授致仕
余懋學字行之婺源人隆慶戊辰進士授撫州推官擢給事中
張居正進白燕白蓮頌抗疏言大臣不當獻瑞劾南守備太監

申信不法又疏陳五事與居正忤斥為民起故官奏奪成國公

朱希忠王爵請召還岳相魏時亮十八人帝俱報可擢南尚寶

卿上臣工十蠹疏其所言好勝之弊必成朋黨後果如其言累

遷南戶部右侍郎總理漕儲卒贈工部尚書追諡恭穆

明史本傳

王鏐原名之臣休甯人隆慶戊辰進士知鄞縣御海船工費數

百金三年無海寇歷升戶部主事值地震上二疏甚稱帝意然

竟以疏內指斥權貴左遷後擢尚寶丞卒

徽州府志

黃金色字煉之祁門人隆慶戊辰進士知晉江縣改德興二邑

皆祀之升南戶部主事歷禮部郎中值大旱帝徒步郊禱上疏

以純心格天為言又疏陳六事以忤貴近罷後起歷廣西參議

徽州府志

吳自新字伯恆祁門人隆慶戊辰進士歷杭州知府歲省織府

錢數千緡有重犯匿勳貴家執而戮之遷兵備副使歷左右布政歲祿設法以賑民不知饑杭人祀之巡撫河南晉南禮部侍

郎卒

徽州府志

胡用賓婺源人隆慶戊辰進士知樂清縣至誠愛民為治以德

內召民遮道攀留仕至太僕卿

溫州府志

程應元婺源舉人任溫州推官簡靜有威民自懾服署永嘉廉

潔益著遷臨江府同知

浙江通志

曹樓字世登歙縣人隆慶辛未進士授戶部主事督學四川會

松茂之役軍中率從借筭遷江西右參政蜀人祀之名宦

江南舊通志

重修安徽通志卷一百八十五

人物志

宦績

徽州府

胡宥字子仁休甯人隆慶辛未進士知長垣縣平獄訟省租庸

援南御史張居正柄國御史傅應禎以言事編戍特疏請釋巡

按廣西攝廣東鹽法佐軍興用兵八寨有功賜金幣御宴七次

會廢書院疏言程明道不當廢左遷貴州僉事

江南通志 徽州府志

葉時新字惟懷休甯人隆慶辛未進士授甯波推官禁溺女定

婚禮擢給事中出守河南括公例二萬餘以當通賦罷官稅之

不當權者七十條勒之石升四川副使卒河南祀之名宦

江南舊通志

羅應鶴字德鳴歙縣人隆慶辛未進士知景陵黃岡二縣擢御史差巡茶馬宿弊一清再按粵東適有蝥戶之役應鶴言於督撫曰耦而俱者蝥與民也願多生俘之母馘納其言先後釋纍俘數千人督學三輔轉太僕卿歷升保定巡撫築東明長垣河隄以艱歸江南通志

俞文達字行之婺源人隆慶辛未進士知四會縣界連海島山寇剽掠為患文達巡視要害設守禦嚴保甲民獲安堵卒於官寮友捐資以斂民為立祠徽州府志

方揚字思善歙縣人隆慶辛未進士知陝州歷遷南戶部郎有怙權相勢者私據公田託言為社田以給貧乏乞為記不應遂以事誣之謫嘉興同知吏胥有父死欲火者給棺以葬遂嚴焚屍之禁歲疫捐俸施藥署嘉善清丈田斥餽遺擢守杭州尋乞

歸揚嘗赴鄰郡遇盜知為揚羅拜而去浙江通志 江南通志

游有常字心甫婺源舉人知井陘縣興學校置學田建社倉立社師邑有麻郎廟俗以元宵操戈相鬪為戲傷不抵命有常毀其廟俗遂革又復古井築城隍設官渡民祠祀之擢南昌同知徽州府志

吳天洪字元卿歙縣舉人知建陽縣下保民十二條邑大治補涇安地接歙壤一絕私交建長生樓濬聚祿池葺商輅墓創漏澤園邑祀名宦徽州府志

游悅開字懋信婺源舉人知儀封縣均徵收柳梢養馬三大役著為令築決河勤荒政收暴骸會督河使與開府諸司會聚河北例率夫役數百往迎時天寒特異歲荒民饑且病道死者十餘人渡河北風更慘舟死又十餘人悅開潛然曰以此罷官可

也遂返舟南岸頗有甦者卒於官民祠祀之徽州府志

吳成器休甯人浙江會稽典史倭寇三百餘劫會稽為官軍所

逐走登龕山成器遮擊盡殪之又破賊曹娥江擢布政司經歷

旋擢紹興通判與賊大小數十戰皆捷身先士卒進止有方所

部無秋毫犯士民卒於其戰處立祠祀之後改武秩王鴻緒任

江通志

張聘夫字仕可婺源人隆慶中知連江縣政尚教化諭以理義

使訟者自新陷大辟者求生不得曲為矜恤尤加意學校刻讀

書錄禮訓常對父老詢民瘼如家人然久之忘其為令也至今

談者猶淚下云福建通志

詹洲字登之婺源舉人知高安縣高安故賦重洲請於巡撫奏

減之歷知象州以老歸徽州府志

施本德休甯人萬曆初由掾尉德安緝捕甚嚴奸宄屏迹聽訟

悉情以清節著丁內艱歸士民遮道送之江南通志

江東之字長信歙縣人萬曆甲戌進士授行人擢御史首發馮

保徐爵奸劾僉都御史王宗載與于應昌共陷御史劉臺出視

畿輔屯政駙馬都尉侯拱宸從父奪民田奏之置於理累遷太

僕卿時張馮黨復構陷張岳沈思孝吳中行趙用賢鄒元標東

之上疏請先自罷坐爭壽官事貶霍州累遷大理少卿以右僉

都御史巡撫貴州擊高砦叛蠻斬首百餘級被劾免官行人時

刑部郎舒邦儒闔門病疫死遺孤一歲人莫過其門東之經紀

其喪提其孤歸乳之舒氏得有後明史本傳

胡天祿祁門人萬曆初德安主簿為治精敏革催徵部運常例

均夫馬迎送勞逸善折疑獄丈軍民田修橋路營館舍以勞績

著

江南通志
新增

余啟元字伯正婺源人萬曆甲戌進士知臨城縣會令履畝啟元以無故擾民置不報改霸州學正累升戶部郎監豫章漕罷虛耗四十萬石又督易州糧儲以清操第一累擢光祿少卿終大理寺卿

江南通志

汪應蛟字潛夫婺源人萬曆甲戌進士授南兵部主事累遷山西按察使治兵易州移天津升巡撫累上兵食事扼險列屯軍聲甚振見葛沽白塘諸田盡為汙萊詢之咸言斥鹵不可耕應蛟乃募民墾田五千畝為水田者十之四利大興移撫保定上疏請廣水利可得田數萬頃帝許而不能行召為工部侍郎以養乞歸天啟時起南戶部尚書上愛養十八事帝保母客氏求墓地踰制持不予遂見忤乞骸骨歸陞辭引宋儒語以宦官宮

妾為戒卒於家

明史本傳

張應揚字仲言休甯人萬曆癸未進士知蘭谿縣清田畝無虛稅歲饑捐資倡賑置社倉勤課士擢御史出按雲南順甯代候

代候義未詳

二寇構兵籌策匡定復按福建出冤繫十餘人卒於官

汪渙休甯人萬曆癸未進士知廣昌縣端正嚴凝一塵不染與民休息境內乂安升主事

山西通志

吳正大休甯人萬曆九年浙江仙居主簿剛介自持不媚權貴攝縣事併課清丁法良意美大僚子姪殺人必得其人以置諸法時稱天下清官第一

浙江通志
新增

程朝京字元直休甯人萬曆癸未進士知鄱陽縣邑多逋賦立周知實徵二冊賦遂如額陶丁蘭芳威為亂降之請貸其死後

爲名將升永平知府因灣水運糧至闕家口省費數倍晉福建

副使江南通志

潘士藻字去華婺源人萬曆癸未進士授溫州推官釋株累抑文致時無冤民擢御史以發近侍姦觸東廠張鯨怒會火災修省疏請修身親賢乃摘其語激帝謫廣東按察司照磨後擢南

吏部主事歷尚寶卿

明史李沂傳 浙江通志

邵庶字明仲休甯人萬曆癸未進士選庶吉士改兵科給事中疏請清驛遞汰運總冗員革錦衣冒濫裁戚畹越請升工科都給事再補禮科疏請臨御躬祀行召對開儲講升太常少卿

江南通志

吳中明字知常歙縣人萬曆丙戌進士爲瑞汀兩府推官升主事歷吏部郎中疏列三楚礦奄陳奉暴橫狀督學河南晉汝甯

參政汝甯王縱僕殺人置之法王走訴於帝中明劾王擅離城愬不得行備兵薊鎮邊牆臺堡屹然改觀升陝西布政巡撫廣

西晉南戶部侍郎卒贈尚書

江南通志

方元彥字士美歙縣人萬曆丙戌進士知金華縣擢御史按甘肅陳備邊五議按福建釋冤發奸卻紅毛番市鎮安海堡城又入言星變地震宜撤瑞使以答天譴卒於官

江南通志

金繼震字長卿休甯人萬曆丙戌進士知濬縣歲凶卽開倉賑恤改義烏會公署火恐獄囚盡斃縱之歸約令自來後無負者爲有隙者所中遷長沙推官啟藩王歸民田抑稅瑞什其旗遷刑部郎中恤刑山東遼左釋冤繫重辟四百八十二人

江南通志

吳應明字以誠歙縣人萬曆丙戌進士知福安縣有治績累擢都給事建言國本升太常少卿福安祀之名宦

江南通志

胡漢歛縣人萬歷中知郴州修志建學置祭器新橋梁除常例

省繇役州稱大治

湖南通志

汪大壯祁門人萬歷中知甯鄉縣聽訟曲中情理擢判黃州不

能治裝吏出贖云積逋贖緩若干可潤行橐大壯悉蠲之

湖南通志

洪文衡字平仲歛縣人萬歷己丑進士授戶部主事帝將封皇

長子為王抗疏爭之改禮部引病歸起補南工部郎中杜中貴

橫索節冗費進光祿少卿改太常時特起顧憲成憲成已辭疾

徐兆魁等猶憚其進用首疏力攻文衡乃上疏言兆魁貽禍賢

者流毒國家尋進大理少卿遷太常卿光宗崩議升耐文衡請

祧睿宗疏格不行卒贈工部右侍郎天性孝友居喪不御酒肉

不入內者三年

明史本傳

黃全初字性甫歛縣人萬歷己丑進士知崇德縣歲荒請蠲逋

賦當事不可乃移疾歸後起官歷升南戶部主事軍餼多冒支

江南通志

悉釐其弊歲省萬四千緡晉郎中

汪先岸字登宇休甯人萬歷己丑進士知光山縣擢御史上疏

請正國本首輔依違其議即疏劾之巡視漕河建開泲河議河

江南通志

成歲省無算仕至太僕卿魏璫用事削籍歸

程有守歛縣進士萬歷二十二年知惠州廉而有威歲旱步禱

賑饑平糶羨餘輒行諸縣積穀視事至日盱一蔬一粥復理簿

廣東通志新編

書創鬻宮復科舉額畱心文治擢海南學使

汪以時字太易婺源人萬歷己丑進士知嵩縣歲饑倡賑斃大

猾以安民擢御史督理河東礦使張忠奏開採南池徵收鹽課

以時累疏抗阻遂為所誣被逮以輔臣救得釋巡按山西廉治

稅棍按部出死囚八百餘人閱視三關建城堡於青龍驛邊境

以靖遷南太僕卿卒

江南通志

汪承爵字仲修歙縣進士萬曆二十三年知南康縣操守嚴重

葺學舍闢旭山書院率諸生課藝其中

江南通志 新增

游明孚字伯順婺源人萬曆己丑進士知麻城縣歲大祲酌戶

丁議改折杜飛詭汰常例裁冗費辨冤抑蘇保馬治行冠全楚

為飛語所中罷歸

徽州府志

汪可進字惟正休甯人萬曆己丑進士知石首縣河決賑饑全

活萬計權使煽虐引法折之播賊叛先事為備邑賴以安未幾

河復決可進已升南戶部主事為留塞決河乃去

江南舊志

葉伯鳴字雲羽休甯人任沂州同知塞礦穴疏鹽禁署篆單父

平馬政出大辟三人邑以白蓮教株累者為開釋百餘人改涿

州升趙王府審理正上籌邊九策

江南通志

李應裕字履順婺源舉人知羅源縣升平樂府同知地多徭人

每為居民所凌相格鬪應裕戒吏民毋為虐徭亦感而斂輯又

立社學使稍知字附為俊秀浸浸向化嘗三稅賀橋一意寬恤

商設生祠祀之羅源人亦祀之名宦

廣西通志

胡玠初名之瑗字元玉休甯人萬曆壬辰進士知建安縣新學

宮置田養士預立義倉備荒早有兄弟訟者令互撻其臂因感

而泣和好如初邑賦煩重令民自投櫃吏不容奸去之日民肖

像祀之升主事擢知贛州祀建安名宦

福建通志 徽州府志

許立禮字季履歙縣人以蔭官中書舍人奉使朝鮮卻餽金升

工部主事督易州炭廠補完宿逋十八萬累官雲南知府善政

甚多

徽州府志

方萬山字仰之歙縣人萬曆閒任雲南按察使時兵燹之餘凋

疲未起萬山秉公肅憲覈濫冒汰首功慎讞決釋累獄隴川弗靖旋就削平運籌助贊之力居多公餘寄情山水尤加意作人梓課藝改學宮人文蔚起

雲南通志 新增

汪國楠字仲木婺源人萬歷乙未進士知蘭谿縣徵輸有法課士有方修義倉行保甲升南兵部主事疏論花木不宜濫進內臣不宜擅差改禮部出守正定郡淳沲河決工費叵測無敢言築堤者國楠堅請用鐵鍋連鎖載石沈水法隄遂成歷升南瑞道副使改東甯卒於官

金華府志 徽州府志

江起鵬字羽健婺源人萬歷乙未進士知永甯縣創義學置社師申保甲盜賊遠屏習俗一變調姚江覈畝給券清弊釐奸礦使至毅然抗止民肖像龍山祀之晉南工部主事條陳十事掌錢法疏言利弊七事轉禮部升郎中卒於官

徽州府志

方時化字伯雨歙縣舉人知朝城縣白蓮為亂偵知城中周王

二猾與賊通乃召而諭之貸其宿負二人願以死報遂計縛賊

首閻氏等斬之調鉅野招撫流散升敘州府同知

江南通志

邵兼休甯人任廉州府理刑萬歷三十五年署雷州府事廉正

不阿為當道所推治獄能推見至隱撥煩理劇游刃有餘不踰

月民歌愷澤清查新城門外商稅申說定例刻碑遵守尤加意

士類訓迪師儒資之廩餼捐俸置田六十餘畝為諸生供給之

費多士咸奮興鼓舞以為攝篆所難與戴嘉猷並稱

廣東通志 新增

鮑應鼇字山甫歙縣人萬歷乙未進士授戶部主事權崇文稅

以清操聞歷禮部郎中皇太子生母孝靖太后薨詔喪禮視世

廟沈貴妃應鼇以為簡乃考穆宗生母孝恪太后為康妃時故

事上之得允行應鼇端亮有學識議事守正不阿羣小忌之官

終太僕卿一統志

畢懋良字師皋歙縣人萬曆乙未進士知萬載縣擢南吏部主事督學浙江兩臺竿牘概不得入為福建督糧道積穀數萬石後紅夷寇海上糧艘不通發其所蓄全活無算歷升布政使減加派撫降海寇擢戶部右侍郎總督倉場弟懋康忤魏黨削籍而懋良亦以不附被劾落職閒住兄弟相繼去國士論以為榮

明史畢懋康傳

江南通志

朱珏休甯人萬曆中黃陂縣典史潔己執法專鋤豪右黃安耿尚書定向嘗歎美之一統志湖北名宦

洪世俊字用章歙縣人萬曆乙未進士授禮部主事時諸王婚期踰制福藩久不之國力爭十餘疏出為福建參政歷右布政使紅夷入寇預保圭嶼儲火藥禦之寇不為患轉山東右布政

平白蓮賊有功升太常卿卒贈兵部右侍郎江南通志

汪元功字元倩歙縣人萬曆乙未進士知光化縣討平劇盜張

經歷知吉安順德二府備兵雲中力行節省完兩年貢布一十

六萬額素囊部落與釀家構殺馳往解之後為湖西兵備兼攝

嶺北滅洞賊督河工卒祀名宦江南通志徽州府志

洪都歙縣人萬曆乙未進士任福建歸化知縣政平訟簡自題

其署曰民風僻壤原鄒魯吏治青山但嘯歌後移知閩縣福建通志

增新

吳宗堯字仁叔歙縣人萬曆乙未進士知益都縣中官陳增以開礦至宗堯與抗禮驛丞金子登說增開孟邱山宗堯叱之遂搆於增日徵千人鑿山多捶死又誣民盜礦捕繫五百餘人宗堯盡發其不法事增遂劾宗堯阻撓礦務被逮使者至民哭聲

震地下詔獄考訊經年始釋明史本傳

謝存仁字生甫祁門人萬曆壬辰進士乙未殿試授戶部主事

權關監兌俱有清望督儲遼陽節省餉銀二十七萬升參政歷

雲南左右布政以平奢酋功升巡撫簡兵核餉為剿撫用請告

歸江南通志

胡思伸字君直績溪人萬曆乙未進士知上虞縣築夏蓋白馬

上妃三湖又築梁湖包村港石閘歷升副使備兵懷隆建城堡

四十餘所修南北邊垣三百餘里通水利開曠土所在立祠祀

之晉保定巡撫練兵製器以資守禦開復何家圈屯田以廣積

儲設鐘樓以輯羣盜畿南賴以奠安江南通志徽州府志

汪尚誼字宜言婺源人萬曆乙未進士除大理評事平汪浩等

百餘人獄狂獯一清歷知長沙府升河南副使剿緝土寇轉參

政以疾歸徽州府志

程寰字伯輔歙縣人萬曆乙未進士知光澤縣立義倉義學教

養備至擢刑部主事督糧浙中漕運如期升湖廣按察使長寶

洞蠻為亂親冒矢石剿擒之晉浙江布政使一統志福建名宦徽州府志

汪一棟字國正婺源舉人知清河縣有奸猾思助稅瑞馬堂為

虐欲於清河起稅一棟密縛首事數人斃之杖下餘黨遂遯秋

霖時溢量地築隄水不為災舊有疑獄廉得其冤亟白釋之以

入覲卒櫬至清河士民哭而弔者數千人建祠祀之徽州府志

畢懋康字孟侯歙縣人萬曆戊戌進士授中書舍人擢御史視

鹽長蘆畿輔河渠多湮廢以懋康言修復之巡按陝西疏陳邊

政十事劾罷副總兵王學書等七人請建宗學如郡縣學制報

可歲旱設粥廠發倉廩全活饑民十二萬既而山東旱乃命巡

按山東至則蠲賑備至復條上十事視賑秦饑加詳所救凡數百萬擢順天府丞以僉都御史巡撫鄖陽魏黨以其為趙南星所引削籍歸崇禎初起南通政歷戶部右侍郎旋引疾歸明史本傳游漢龍字蟄初婺源人萬曆戊戌進士知章邱縣時貂璫四出而陳增尤橫漢龍幹旋其閒因得撤去諸礦稅官歲以千金為額辦以官俸不復煩民召補部郎尋備兵三關適旱蝗相繼請發粟四十萬石平糶歷浙江按察使遷福建布政使紅夷為亂以客將易土將寇遂就擒轉光祿卿閩人建祠特祀徽州府志洪翼聖字秀鄰歙縣人萬曆戊戌進士累官南陽知府贖鍰俱積之屬邑以糶穀不入府藏惟文移申報而已擢陝西提學仕終光祿寺卿江南舊志潘之祥字伯和婺源人萬曆戊戌進士知潛江縣築隄以障江

水之齧置藩吏於法以正舞文之罪稅璫陳奉置榷關於潛江策口偽弁藉勢肆虐一廣文挈家之任誣以誘略收其資沈其人之祥立繫偽弁斃之杖下擢御史巡視長蘆鹽法其封事有簡賢能重事權禁影射止開引諸條遷江西參議以議捐湖關稅額不合引疾歸徽州府志

俞喬字君望婺源舉人官鄭州知州歲饑民逃招聚流亡立勸懲勤考校教民鑿井做南方水車法置陂堰做南方開閉法自是上下地皆可田所有羨餘盡為民開荒田疏水利起室宇買牛種並代充兌軍餉士民德之請於朝帶銜畱任以疾歸鄭人立生祠焉徽州府志

方可權字惟中績溪舉人知星子縣革耗羨捐贖鍰多置船以救溺又造哨船以代徭役卒於官士民哀慕祀名宦徽州府志

程子鼂字坤輿歙縣人萬曆辛丑進士知蘭谿縣吏以解羨上

叱而禁之尤雅意作人士民肖像祀之官終江西按察使江南通志

程汝繼字敬承婺源人萬曆辛丑進士知餘杭縣守道嫉邪不

信妖異吏懼其威民愛其慈重建儒學日進士相與講明孝弟

廉謹之理浙江通志

俞時育號對倉休甯舉人知定南縣猺賊為橫招降五百人隸

為兵自是安堵改隆安兩邑皆祀之徽州府志

劉兌歙縣人萬曆中知富平縣廣開渠道為邑永利一統志陝西名宦

戴應揚字君俞婺源舉人知陽穀縣革火耗及行頭換牒之稅

歲旱蝗徒步泣禱雨注蝗死聽獄片言立解置學田資貧者以

入計卒於邸士民聚哭建祠祀之徽州府志

方道通字寓庸歙縣人萬曆甲辰進士知江夏縣有宗室子戕

民置之法勢要請謁一無所諾調浦城士民肖像祀之官終湖

北兵備副使徽州府志

吳國仕字秀升歙縣人萬曆甲辰進士授刑部主事出知嘉興

府築海塘建石梁於王江涇人稱吳公橋晉湖廣江防兵備江

心浮玉磯水漲磯沒舟觸立碎因建高閣為指南備兵辰沅苗

酋龍滔叛殺官吏國仕築邊牆一百一十里建哨堡礮樓增戍

兵龍滔就擒參政川東奢酋將樊龍踞渝城國仕以計擒之尋

奉命搗蘭搗蘭義未詳追斬二千有奇轉福建左布政降海寇八閩

平歷戶部侍郎卒於官贈尚書西臺摘疏江南通志徽州府志

汪有功字祖倩歙縣人萬曆甲辰進士知蒲圻縣擢御史疏十

數上如勸青宮講學劾巨璫亂閩等事俱切中時弊挺擊案興

極言張差當窮治按下江捐鍰金二萬為諸路積穀官終尚寶

司丞

江南通志

汪輝號桂河休甯人萬曆甲辰進士選庶吉士授編修歷南吏部侍郎魏璫建生祠覬輝為祠記以為榮拒不許遂銜之矯旨

削籍崇禎初復官

江南通志

程國祥字仲若上元人

府志欽人上元籍

萬曆甲辰進士知確山光山

二縣有清名歷文選主事發御史楊玉珂請屬魏璫逐趙南星

以國祥為其屬并削籍崇禎初起考功郎中主外計時稱公慎

御史龔守忠詆國祥通賄帝知其清褫守忠官歷戶部尚書改

禮部兼東閣大學士乞休歸

明史本傳

余懋孳字舜仲婺源人萬曆甲辰進士知山陰縣擢給事中首

疏請發畱中章奏舉枚卜釋繫囚徵遺佚罷稅使賑饑民黜西

洋天主教章數十上帝俱不省最後四疏請皇太子皇長孫講

學語尤切至卒於官

江南通志

倪思輝字實符祁門人萬曆丁未進士歷吏科給事中侯震賜

之論客氏思輝與臨川朱欽相繼之帝大恚並貶三人皇子生

詔起復故官旋以忤魏璫削籍崇禎初復起終南京督儲

明史侯震賜傳

賜傳

舒榮都字曰俞黟縣人萬曆丁未進士授中書舍人擢御史上

三字疏曰虛公嚴其要在於擇相又疏論邊情辨門戶言皆剴

切出按湖廣貴州土司亂用其策剿平之魏璫亂政將與楊左

等連疏劾之以艱歸不果憂憤而卒崇禎初追贈太常卿

一統志

江秉謙字兆豫歙縣人萬曆庚戌進士知鄞縣以廉能徵擢御

史天啟元年首陳君臣虛己奉公之道規切甚至瀋陽失守力

訟熊廷弼保守危疆功廷弼旋起經略而本兵張鶴鳴抑之專

鹿王化貞秉謙抗疏極論鶴鳴之罪內操事興與惠世揚等十
二人再疏力攻遂出於外後聞璫益亂政憂憤卒追削其籍崇
禎初復官明史本傳

程策字獻可休甯人萬曆庚戌進士授西安推官轉南禮部主
事時拜魏璫祠者如驚策獨不往出守德安有七府奸民同謀
不軌密捕渠魁餘不問督學廣西具藻鑑晉郎襄參政流寇深

入大敗之以勞卒於官廣西通志 江南通志
曹澤婺源人萬曆閒判漳州司郡儲滌弊蠹絕苞苴三年清白

一節卒於官貧無以斂輿隸編氓咸賻助焉福建通志
汪泗論字自魯休甯人萬曆庚戌進士知漳浦縣調福清有惠

政清屯田繕城堡擢御史首請杜內批以嚴履霜之漸又請召
還楊漣等以作士氣奄人王體乾魏忠賢等十二人命予錦衣

世襲抗疏爭之不納後忠賢卒至大橫出按江西敦重持大體
奸宄肅然歷太僕寺少卿嘗識黃道周於諸生中人服其精鑑

明史董漢儒傳

殷光彥字元楷歙縣人萬曆三十五年福建泉州府通判值安

平新設鎮移駐焉時庶務草創光彥至未數月百務具舉鎮去
郡遠惡少博塞探丸擊劍恣睢罔忌奸人利鎮殷富耽視思逞

光彥首懲諸惡少而明保伍飭游徼嚴街鼓於是俗變民安夜
尤無警鎮城數圯外隍為繕陴塞港以壯之福建通志 新增

汪道崇字伯凝婺源舉人授平陽府通判過大名遇中貴衝道
而過中貴怒揭之巡撫巡撫曰彼不愛官督之何為視象稷山

有妻殺其夫者捏夫弟以抵道崇一訊即服時稱神明徽州府志
汪文偉字仲簡婺源舉人知冀州興學校賑饑荒猾胥李某倚

其兄為司禮監屬璫侵漁倉庫立致之法流寇過城民登陴禦之寇曰從此過耳不忍陷汝州汪佛子也升延安同知未赴歸

徽州府志

唐暉字文季歙縣人萬曆庚戌進士官開封武昌兩府推官府皆藩封宗民雜處累興大獄暉至郡皆稱平遷太常卿壬申流賊起擢湖廣巡撫臨武藍山土寇下攻長沙伏兵搗其巢平之豫寇窺郢中檄辰州兵伏應山傍夜搗其營斬獲甚眾賊魁有號十閻羅者斬其二而俘其二賊乃遯與郢西賊合陷當陽遠安暉調鎮筸兵復之又剿平蘆花溝仙桃鎮諸賊為忌者所中

免官 徽州府志

汪應奎歙縣舉人任福建上杭知縣平易鯁直有中之者民羣赴直指訟冤賢聲益著居八載升廣州通判囊橐蕭然 福建通志

增

汪康謠字淡中休甯人萬曆癸丑進士歷戶部主事司庾臨清白蓮煽亂捐俸籌防賊知有備從他道去遷郎中出守漳州有泛海遭風者七十四人鎮將等誣其為寇康謠廉得實盡釋之漳故有洋餉上供外歲羨數萬金一無所染推漳南參議崔呈秀同門友也絕不與通呈秀銜之又以閣周起元籍沒事不辨遂矯旨削奪崇禎初擢福建兵備以元旦乘閩賊無備馳師襲之斬馘無算以疾歸 一統志福建名宦

趙時用字德友休甯人萬曆癸丑進士知南安調閩縣閩俗修怨者輒噉斷腸草死官為沒怨家資時用必廉其主謀者置之法刁風漸息擢給事中疏言恩蔭不宜濫敘升太常少卿又抗言閣臣票擬讓權中官事多內批宜防其漸遂削籍崇禎初起

南鴻臚卿以老歸江南通志

方有度字方叔歙縣人萬曆丙辰進士知長治縣縣主藏吏月

更一人辦供億家立破有度首革其弊擇廉謹者司之擢給事

中議紅丸移宮二案後為閹黨所中削籍惋憤而卒江南通志

汪應元字長孺歙縣人萬曆丙辰進士授太常博士奉差歸魏

瑞用事遂不出崇禎初召為御史出按廣西罷牛稅罷榷本多

所興革督學北畿告歸盡自焚其諫草江南通志

汪元標字承景歙縣人萬曆丙辰進士知潭陽縣擢吏部主事

魏璫熾拂衣歸後起福建兵備飭海防擒大盜蕭潮清等千餘

人晉福甯參政歸江南通志

汪秉元字初甫婺源人萬曆丙辰進士授大理評事轉南兵部

嚴郵符以肅驛傳清汰禁衛虛冒出守南昌築潤澤圩灌田萬

頃拒上官建魏璫生祠之舉調九江流賊聲言來寇秉元晝夜

巡視以忠義激勸士民輸餉者恐後寇不敢犯以勞卒官徽州府志

舒崇功字謙夫黟縣人萬曆丙辰進士知衢州捐橋林之租罷

採木之議升福建兵備衛人祀之徽州府志

畢成康休甯舉人知瑞安縣懸示於門曰有一日閒且歸耕爾

地無十分屈莫輕入此門農商樂業豪猾屏息兵餉促迫不待

催科而自足歲早祈禱大雨隨降卒賴有年溫州府志

黃願素字若鏡歙縣人萬曆己未進士授撫州推官擢吏部主

事魏璫濫爵疏汰假官百八十員又禁飛布山燒鑿以護郡鄉

龍脈鄉人德之江南通志

仇夢台字泰符歙縣人萬曆己未進士知平鄉縣調長垣白蓮

賊偪城增陴浚隍繕兵布謀賊遂去擢戶部主事權淮稅卒於

官徽州府志

胡自舜字九疑祁門人以貢官池州教授視篆上虞邑有運河

與曹娥江鄰歲久隄壞江水害稼自舜開塘建閘水患頓息民

祠祀之徽州府志

汪文言歙縣人初為縣吏負俠氣入京輸資為監生察東宮伴

讀王安賢傾心結納光熹之際外廷倚劉一燝而安居中以次

行諸善政文言交關力居多魏璫既殺王安禠其監生逮下獄

得末減益游公卿間輿馬填溢戶外葉向高舉為內閣中書魏

大中韓爌趙南星楊漣左光斗皆與往來會羣小與大中光斗

有隙遂借文言發難屬傅樾劾大中光斗與文言交通立下文

言詔獄以眾正疏言廷杖禠職牽及者得免後魏璫與羣小憾

眾正甚再興前獄盡入諸君子名逮文言下獄許顯純鞫之使

引漣等文言仰天大呼曰世豈有貪賊楊大洪哉至死不承顯

純乃自作文言供狀文言復大呼曰汝莫妄書異時吾當與面

質顯純遂即日斃之明史魏大中傳
參用楊漣傳

吳懷賢字齊人休甯人天啟四年與纂修實錄授內閣中書舍

人同官傅應昇者魏忠賢甥也懷賢遇之無加禮楊漣劾忠賢

疏出懷賢書其上曰當如任守忠即時安置又與工部主事吳

昌期書有事極必反反正不遠語璫怒坐以結納汪文言為左

光斗魏大中私人下獄拷掠死崇禎初贈工部主事明史萬
曆傳

許啟敏字元建歙縣人以舉人任登州府推官有負官物抵法

繫獄至數百人啟敏多所平反白院道出之其不可者令煎鹽

貸死晉兵部主事江南
通志

黃正賓字賓王休甯人以貲為中書舍人思樹奇節萬曆十九

年羣臣請冊立東宮而改期屢緩申時行又具揭迎上意正賓

抗疏劾之下獄拷訊斥為民遂見推清議天啟初起故官遷尙

寶少卿以汪文言獄有連坐贓千金遣戍大同崇禎初復官魏

黨徐大化楊維垣罷官潛居輦下交通宦寺正賓疏發其奸勒

歸田里都人快之明史羅大紘傳

曹士鶴字元翀歙縣舉人歷官戶部主事後擢河南裕州知州

濬城濠募勇敢勤操練清積弊土寇魯和尙煽亂擒斬其渠帥

餘黨皆遜家居講學彙聚遺經講義百餘種以壽終歙縣志

汪秉忠字行甫婺源人天啟壬戌進士授甯波推官甯波翠巖

遇陰雨有鬼為行人害秉忠疑之責丁壯勒限擒獲果獲十餘

人歷升戶部主事卒於官甯波祀之名宦徽州府志

吳彥芳字廷祖歙縣人天啟乙丑進士知莆田縣擢御史大凌

被圍疏論孫承宗又駁逆案呂純如辨冤之謬登州用兵請撤

監島中官以助吳執御舉劉宗周黃道周劾通政使章光岳等

擢上怒復為執政所構下獄尋釋歸明史吳執御傳

汪繼英字志在休甯人崇禎閒以貢官鬱林州同知署州篆勵

清操革火耗民便之州有水口形家言宜建高閣以砥下流築

長隄以迴龍脈繼英捐俸倡之潯貴剗馬賊來寇躬自守禦城

賴以全廣西通志

汪德元歙縣人崇禎時以貢知蒼梧縣省刑法絕苞苴楚藩避

寇入梧禮敬調護而衛兵則挺身捍禦禁其暴虐賀縣土寇起

佐郡將防禦餽運無缺民賴以安以忤當道罷官廣西通志

程道新號涵初歙縣人以蔭官荊州府同知駐施州衛忠尚安

撫覃寅化與衛民牟海蛟爭地相仇殺頻年不解道新至為分

理曲直遂輸服弭兵大豪牟文仲等寇掠為害以計縛之民得
以安

徽州府志

胡階慶字象泰績溪舉人知餘杭縣飛蝗食稼以米易之蝗捕
盡而稼不傷又率鄉勇擒盜首赦其脇從卒於官

徽州府志

余自怡字士可婺源人崇禎戊辰進士知湘陰縣著慎刑錄薄
責必記用重刑則加圈以識之廷議加楚餉湘陰增至四千自

怡持計畝之說得減十五臨藍寇橫行長岳親率鄉勇堵禦寇
解擢戶部主事出守廣州當入覲士民遮道乞畱

一統志 湖南名宦

程子鐸號槐塘歙縣人崇禎戊辰進士知沙縣更輸粟例易戶
解為官解官民兩利調長垣募兵八百不動公帑升戶部主事
卒兩縣皆祀之

徽州府志

王文企字子及歙縣人崇禎戊辰進士授吏科給事中淮陽山

東饑以賦重民愁直言極奏疏三上觸帝怒謫國子典籍歸州

府志

方士亮歙縣人崇禎辛未進士歷嘉興福州推官擢兵科給事
中疏劾謝陞誹謗君父洩禁中語又連劾諸督撫張福臻徐世
蔭及總兵馬爌等而請召舊諫臣姚思孝等且恤已死者吳執
御等帝頗采納周延儒出督師請士亮贊畫延儒獲譴士亮亦
下獄久之釋歸

明史 熊開元傳

韓如愈字弗如黟縣人崇禎辛未進士知安化縣以廉能名士
官安某誘武弁殷朝陽至家剔其目徧賄求免獨如愈弗納抵
之法擢兵科給事中都給事曾應遴如愈同年友也為人傾險
如愈欲劾之或言散員不當劾都諫如愈正色曰是黨同寮而
欺明主也卒劾罷之又劾大將賀人龍臨陣逃乞立斬以肅軍

政明年劾罷江西巡撫張鳳翮晉兵科右給事中管十二團營
稽覈隱冒無所縱先是巡捕營兵半為豪門奴隸及巨奸積猾
冒名漁餉遇巡閱則雇市人乞兒充數或以緝盜為名羅織平
民蝕其資產民無控所如愈力陳其狀弊少止山東總兵劉澤
清為言官所糾遣人持賄刺取兵科如愈發之澤清懼遣書幣
求解如愈詈而麾之十七年奉命督餉道出山東民有訴澤清
肆掠者如愈復露章以聞澤清陰使人刺之或知其謀密告如
愈且勸其微服行如愈不從曰吾奉天子命微服失人臣禮因
遇害級寇紀略 江南舊通志 徽州府志
夏雨金休甯人崇禎甲戌進士授紹興推官歷知泉州府南安
斗賊府志作 檇棹賊倡亂諭之即解升副使江南舊通志
羅炯字然明歙縣人崇禎甲戌進士知嘉興縣絕意苞苴時有

一杯清水藏羅炯之謠徽州府志

曹志甯字以道績溪舉人知鎮平縣流寇薄城極力堵禦城賴

以全升武定府推官徽州府志

汪廷鑑字宣卿祁門人以貢官穎上教諭流寇薄城率諸生櫻

守出方略備禦之轉湖州教授稟安定條規以經義教士又置

田以祀安定徽州府志

姚宗衡字幼輿歙縣舉人署平原教諭流寇至與令丞固守著

有勞績庚辰成進士授檢討徽州府志

王之道歙縣人崇禎中官武岡州判土寇袁有志倡亂州境殘

破之道與知州譚文祐督鄉團恢復斬馘有功湖南通志

胡鳴岡績溪人崇禎十四年知枝江縣李自成陷荊州府遣使

說之降鳴岡焚其書囚偽使於獄後出城巡徼船卒謀叛奪其

道婺源縣志

朱廷瑞字增城歙縣人順治丁亥進士知福清縣值兵燹之後

招撫流亡營繕城堡勸課農桑與民休息又修學興文旌節孝

禮高賢案無畱牘囊無餘資以治行擢禮部去福建通志

吳正治字當世休甯人漢陽籍順治己丑進士由侍講出補江

西參政升陝西按察使所至以清廉執法著內擢工部侍郎轉

刑部諸所條議如赦令宜急行文量宜停止禁狀外指攀嚴婦

女私嫁免逃人十家連坐及收旗丁月錢得永著為令晉禮部

尚書拜武英殿大學士守成法持大體以疾乞休加太子太傅

致仕一統志

史士僕字公升黟縣人順治丁亥進士知江山縣時閩地未平

戎馬絡繹區畫有方民以不擾又界連玉山值金王叛亂兵備

城下率眾守禦格戰有功改蒙陰縣安撫凋殘解任之日士民

遮泣黟縣志

汪震元歙縣人順治初知桂東縣時新被苗寇居民無百家震

元捐資葺茅屋招徠逃戶貧不能耕者給牛種攜酒肉履畝餉

勞之由是流移漸息荒畝盡墾民得蘇一統志湖廣名宦

汪宗洙字魯源婺源人順治初以歲貢知內邱縣縣境諸山為

盜藪民多流亡宗洙多方捍禦輯民漸來歸府推官闔囚至

見繫獄僅二人歎其不煩有古循吏風卒於官貧無以為斂縣

民皆感悼一統志

朱昉休甯人明季歲貢生官汾州府推官乞養歸

國朝馬文毅雄鎮撫廣西延入幕康熙十三年二月孫延齡叛通

吳逆圍撫署雄鎮義不屈遣長子世濟齋疏告急至六月賊勢

益熾再陳密疏屬其長孫國楨於昉時國楨甫九齡昉與之穴垣而出抵都陳奏

上諭忠誠可嘉授宥賜知縣改補甯陽決冤獄除惡僧鉏豪扶弱士民

德之

休甯縣志

張士楚績溪人漢明崇禎庚辰進士知秀水縣兼署嘉興滅火耗清隱佔均徭役剔積弊嘗因天旱致禱甘霖隨降飛蝗墮水二邑勒碑頌德入

國朝升兵部職方司主事能舉其職

績溪縣志

余起光黟縣人以舉人知泰順縣申蠲逋賦時海氛竊發光堅壁防禦晝夜堵守孤城獨完

江南舊志

陳蕃祁門人太學生順治壬辰辟署海南之樂會臨高二邑有

治聲

江南舊志

戴應昌字士全休甯人順治壬辰進士知龍門縣明季縣邑殘

破力圖撫循會有徭役徵船應昌曰龍門山國安所得舟捐俸為僦價詳請獲允又請免徭派擔夫在任三載牧蕃畝闢俗和

行興去之日士民號泣遮留至今感德

休甯縣志

胡文學歙縣人順治壬辰進士授真定推官多所平反擢御史陳大弊六條以重根本視兩淮鹽政輯鹽政通考撰准鹽本論

內升京堂給假營葬後以四品服俸管河南道御史事

徽州府志

吳雯清字方漣休甯人順治壬辰進士授潯州府推官峒寇偪城固守有功郡有數大獄久不決立為剖斷擢御史上疏禁邪

教造督捕獄舍又請慎重民牧有齟齬者遂鑄秩歸後卒用其

議

一統志徽州府志

洪琮字瑞玉歙縣人順治壬辰進士授韶州府推官時當用武

苦供億琮條陳十餘事多所裨益妖民郭天鵬不軌乘其不備擒之曲江徭不法觀察使將用兵琮不可行部勘實論七人於

法全活數千人晉刑部主事歷官陝西提學江南通志徽州府志

汪以瀄休甯進士知定安縣以卓異擢吏部主事尋差權北新

關克己勤務國計賴之江南舊志

周士選字萬中績溪人順治開以貢知陸川縣時寇盜嘯聚士

選單騎入賊壘開誠撫諭俱降復墾田土招流亡捐修學宮教

養兼濟以解犯遲延降調士民惜之一統志

余維樞字中台婺源副榜知永年縣葺學宮立義塾築河隄式

布衣張蓋之閭訪以政事後補臨縣修城興學招集流亡異政

冠三晉升督捕主事卒維樞學有本原著有從祀諸儒繫議泮

宮禮樂合集令洛錄及文集江南通志

胡公著字希呂績溪人順治戊戌進士知靈壽縣除耗羨減刑

罰有武舉為盜魁者前令不敢詰公著廉知之延與之飲密諭

捕役擒之明日羣盜來劫被害一統志

吳聖楫字右舟歙縣人以選貢知文縣壤接西域番民雜處楫

力懲奸民冒充旗丁蜀軍竊販馬匹之弊江南通志

許書字元文歙縣人順治乙未進士知涑水縣滿漢雜處最稱

難治書調劑有方旗民愛戴後以禮部郎出知南康府匡廬素

多虎災彭蠡又為盜藪為文告神虎盜俱息以母老告歸江南通志

縣志

洪明鍾字萬貞歙縣人以舉人知海澄縣海澄帥縱卒索餉而

譁明鍾曰餉非緩也吾將按籍而給焉如虛卒倒馬則奈何帥

乃戢在任三年寇盜不敢犯以勞卒官邑人如喪父母福建通志

王澄歛縣舉人爲饒州推官瀕湖盜賊竊發澄於各隘口請設防兵水陸路皆安靜除衙蠹清屯田治獄多所平反薦治行第

一歛縣志

汪斯淳婺源人順治初隨佟督師討湖南敘功授寶慶知府撫瘡痍招流亡民獲安集調建昌重士愛民通商惠賈民甚德之

江南舊志

俞居辰婺源舉人知新昌縣甫下車里胥進填宅金不受值歲凶卽以其金買米數千斛爲賑饑倡劇盜嘯聚召縣尉以計擒之

婺源縣志

汪承瑞徽州人順治時廣州知府革弊釐奸政平訟理卒於任粵人哀思之

一統志廣東名宦

汪濤祁門人順治初以貢士官臨清知州時駐防滿兵圍地越

及鄰邑控部責臨清償相持七載濤曰普天之下誰非王土力

爭得免亂後籍廢賦不準田履畝清勘貧弱戴德以憂歸民臥轍至不得行起補許州州爲征剿孔道設法供應市肆不驚中

州蝗發爲文祭之蝗不爲害又以艱去民立祠祀之

祁門縣志

趙吉士字天羽休甯人順治初舉人知交城縣自明季劇盜嘯聚深山吏不敢詰吉士因勸農闢荒率數騎入山宿土窰訪其

山川險易居民順逆悉得其情一日與同官飲卻月湖張樂賊聞不爲備夜半忽斂兵疾行由閒道擣賊巢擒百一人撫定山

民一千四百餘戶其不從賊者以羊酒旌之敘功升戶部主事權揚關修會典及鹽漕書成擢戶科給事中著有交山平寇錄

萬青閣自訂集

一統志

程文彝字銘仲休甯人康熙甲辰進士選庶常改刑部主事決

讞多平反擢御史多所建白如定

地壇享尙右核工部物料領銀禁軍需私派閒架濫稅清驛馬貽累禁
佐貳武弁嚴刑甄別督撫設倉備荒革除里役廣旌節孝言多
裨益升大理少卿歷工部右侍郎卒

賜祭葬如例

江南通志

吳元襄字贊皇休甯貢生知永康縣時海氛未靖荒亂頻仍元
襄征調有方民以不困東陽義烏山賊屢寇境內殫力守禦事
平區處脅從多所全活先是里總爲奸包藏飛灑悉爲釐剔又
盡革會計陋規至修學宮禁溺女販饑捕盜善政不一去之日
士民童叟送者載道浙江通志
曹有光字暉吉績溪人康熙甲辰進士知壺關縣性澹泊食不
兼味用苞苴竿牘進者直斥之以嚴濟寬盜賊屏跡卒官無以

爲斂老稚胥爲流涕

一統志山西名宦

汪錞字鍾如休甯人江夏籍康熙庚戌進士累官驗封司郎中
每大廷集議序資紛紜而錞口授指揮羣吏咸服調掌選以艱
歸服闋借補稽勳凡十年服政備歷四司後起者多取則焉江南通志

甯縣志

趙端字又呂休甯貢生授長洲丞歲饑設糜捐賑全活甚眾升
介休令卻編審陋例萬金賦役以均補撫甯建書院講學升太
原同知移駐平定置紡車買木棉覓能者教之至今成風徽州府志
王鉉字澹菴歙縣人康熙甲辰進士知徐溝縣時秦晉之閒羽
檄交馳咄嗟立辦民不知兵至禁鋪墊恤郵驛裁耗羨建義學
諸政一皆原本經術歙縣志

汪濯歙縣人由中書歷部郎知嚴州府府市塵秤斗重入輕出

濯設厲禁均平出入至今稱汪公秤斗後爲西安守商州山盜
猝發議者將悉置殊死濯以愚民誘脅力爭止殲其魁三十餘
人遂與督撫均干吏議去官歙縣志

洪玕字琅友歙縣人康熙丁未進士以中書舍人從親藩督師
江西升刑部主事卽死獄已具必婉曲平反改吏部文選司卒
於官歙縣志

項蕙歙縣舉人知廣甯縣升廣順知州蒔蔬自給巡撫嘗語僚
屬曰汝輩知有種菜太守耶凡有疑獄檄令赴讞判斷如神母
歿以毀卒歙縣志

許承宣字力臣歙縣人康熙甲辰進士選庶常歷官給事中辛
酉典試陝西察民疾苦上六疏如查荒丁蠲通賦定潼關稅額
覆鹽丁民丁之實復驛民之舊語中利害直聲大著徽州府志

汪晉徵字符尹休甯人康熙己未進士選庶常歷官給事中條
奏修先賢祠宇增張子世襲停藩臬卓異寬兩廣憑限得准行
丁卯主試湖廣遷順天府丞累官戶部侍郎居家講學著有宋
元明正學錄雙溪草堂集江南通志

黃鐘休甯人康熙甲寅從征効力選南安同知攝贛州守贛州
爲楚粵孔道時採柘木又禁旅調粵舟車牽挽十六屬解夫良
苦鐘議僦費附近募人諸屬晏然擢知梧州府攝鹽驛道先是
管權者過嚴鐘除煩苛省畱滯商旅絡繹課額歲增調太平惠
政益著休甯縣志

余文淑婺源貢生授夏縣丞尋署縣事潔己愛人民化其德會
有飛輓之役剋日赴邊夏邑解額踰數萬民情洵洵官吏束手
文淑以身任其事民乃轉相告曰不可以累吾良吏遂趨赴督

撫奇而薦之以年老力請致仕士民勒石頌德婺源縣志

洪懋樞績溪拔貢知清遠縣熟籌利弊條陳十事如均里糧以

蘇偏累除供應以剔陋規禁營頭之債革加夫之弊督撫皆依

條刊行旋奉檄監剿老虎十洞深歷險阻撫剿並施擒逆魁馮

天保等數十人脅從宵宥之列功首敘以親老歸績溪縣志

朱光裕休甯人知鄞縣時提督材官為盜有司不敢捕光裕夜

半聞劫親率人役獲盜百餘人置於法邑有被誣陷大辟者察

其冤力出之天童山虛糧累民為詳大吏具疏蠲免休甯縣志

朱士剛休甯人以貢生教習授辰州府通判署在沅州學宮無

崇聖祠輸貲倡建並遷學宮於高阜在都時曾別構休邑會館

復義冢休甯縣志

王仕雲歙縣人為衡州推官府有流民逋賦皆坐現戶輸官連

引逮繫仕雲皆釋之蠹吏作奸者杖而械諸市懸鉅於門訴冤者擊之懲勢家宦僕之尤橫者以裁缺去職闔郡謳思一統志湖南

通志

洪景行歙縣歲貢歷知平陽縣首懲豪猾隱蔽田畝之弊差徭

照田均派築肥鰲鵝頸二埭蓄淡水以障鹹潮建義學定冠婚

喪祭儀節禁師巫邪說賃妻火葬諸惡俗有虎害民禱於神虎

自相齧死解組歸士民泣送至今俎豆不絕歙縣志

胡德邁歙縣舉人官中書舍人擢御史疏糾兩江總督范承勳

違例題畱江甯知府施世綸在任守制有乖孝治又屢疏請寬

風聞之禁廣欽恤之仁核計典之實祛斂索之習所言動關國

體歙縣志

程夢瑛休甯人歷官刑部員外發往江南效力疊奉委勘估蘇

松河道監修太倉州劉河督浚丹陽九曲河太倉州七浦河擢
郎中仍監督揚州水利開浚江儀泰如興鹽六州縣海運諸河
工竣奉

命管理江南水利事務開浚淮安大河界溝揚州城河吳淞福山劉河
三大閘次第工成又總理蘇松常鎮太通六屬港渠轉松太道
致仕 休甯縣志

程世績休甯貢生知馬龍州調補黑鹽井提舉時鹽務廢弛泥
攬引積世績反覆千言為竈請命大吏允行萬竈生祀之尋授
長蘆鹽運同知潔己率屬興利除弊三攝運司篆升南安府致
仕 休甯縣志

朱偉字人瞻休甯人宛平籍貢生知高陵縣修學宮興水利革
陋規民德之建祠以祀升嵩明州知州 休甯縣志

汪先登黟縣歲貢知祿豐縣邑當九府要津苗民雜處勸諭開
墾加意學校徵輸有法剔弊愛民升知鄧州以勞卒官上官賞
助歸櫬百姓哀泣路奠立祠祀之 黟縣志

黃元治字體仁黟縣副貢四庫館議敘通判初任平遠府改判
大理府入為宗人府經歷歷刑部郎中出知澂江府事開濬水
道雪理冤獄修城池興學校在滇三載囊橐蕭然人稱青菜太
守卒祀澂江名宦及黟縣鄉賢祠 一統志

查廷藻休甯人康熙二十七年知大埔縣時埔尚仍明季舊規
合一歲甲役徭役襍役勻攤里圖按丁糧多寡計日值辦名曰
日生派無定額蠹胥因緣為奸催科敲撲民不堪命逃亡過半
廷藻為詳請裁革積弊頓除民以更生相慶 廣東通志新

吳鶚字羽騫黟縣人康熙乙丑進士知歷城縣省繇役弭賊盜

使積賦自完逃囚自返悍卒自戢解組歸士民攀轅臥轍祖送百餘里

黟縣志

汪澐字苻洲休甯人康熙甲戌進士由翰林歷官內閣學士出撫粵西移撫江西入爲戶工兩部侍郎終大理卿一典鄉試再任學政撫粵時蒼梧芋英嶺饑民潛聚竊挖礦砂貽害地方澐添設游兵於梧州防禦羣盜自戢在江西奏請停運倉穀入閩闔省無乏食憂安西建城遠在嘉峪關外澐奉

命往審度形勢爲新城方六里復修築沙州城建立五堡創十三墩臺以嚴斥堠後又修治高堰河工浙江海塘及淮陽水患鳳潁水利又嘗奉

命纂修

一統志康熙字典治河方略等書以老乞休卒年七十四

休甯縣志

衡永柳參議道在兵部時逃人法十家連坐無辜繫累景從輒出其疑者分巡濟東時運草束赴德州養官馬吏見民船輒禁止景從令船自實其載以餘力分帶草束更分給於糧艘不攬一民而公事立辦後遂爲例

休甯縣志

朱光圉字西仲休甯人由主事升刑部郎中讞獄平允出知贛州府潔己率屬歲饑賑濟全活甚眾瑞金縣水災按行周卹且爲蠲稅蘇累長甯令更變鹽法民幾至變光圉單騎往民曰此慈父母也卽散去未幾以屬吏虧帑金罷民爲分償立祠廉水之上

休甯縣志

蕭彩字雲陽歙縣人以武進士歷官直隸張家口游擊建甯邑宰以催科激變彩諭以禍福父老乞彩代收上官委之逋賦悉清署浦城遊擊縛渠賊羅某杖殺之又以檄散饑民嘯聚之黨

諸生高雲一家為賊所殺凶器乃一屠刀吏逮鄰屠誣陷成獄
彩訪得真賊抵法冤者得釋歙縣志

吳之錄歙縣人英山教諭嚴立課程行己簡肅一循白鹿洞規

毅然以聖道為己任英山縣志 舊志六 安州流寓 新移

唐鴻舉歙縣人康熙戊辰進士知鎮海縣俗多爭嗣強娶鴻舉

至立法禁之聽訟立為判決獄無停滯人無株連他邑陳訴往

往乞下鎮海理問農時則裹糧親歷田間簡稽勤惰款曲如家

人行取補戶部主事擢兵科給事中子廷賡亦成進士知瑛縣

其治民有父風嘗抑強暴全寡婦袁氏之節歙縣志

許廷佐字廉伊歙縣人由武進士歷官河南河北鎮標中營遊

擊鉛山民查氏無故忽奉按察司提問縣令將發解廷佐以查

氏良民不合驟攔重譴詰來吏見其言語支吾因轉牒縣令毋

遂發而密以上請果得其奸查氏得無累歙縣志

汪遴卿字邦臣歙縣貢生歷官重慶府通判康熙己卯署夔州

知府履畝清丈核其荒熟酌定奏銷招徠墾種遷廣西泗成軍

民府同知地連交趾徭蠻雜處建學訓士課藝值黔省上江土

司爭地弄兵奉委馳諭兩各輸服解散軍民安堵歙縣志

吳肇新婺源貢生歷兵部主事督理贛州鈔關贛為川貴門戶

肇新稽察嚴明徵稅有法入為刑部郎出守彰德府修葺學宮

振興文教嚴保甲謹斥堠盜賊斂迹以艱歸士民為塑象豐宮

祀之婺源縣志

汪時婺源貢生官瓊山縣丞歲饑力請發賑全活無算攝澄邁

篆首革徭差二千餘金履畝丈量豪強懾服修葺豐宮士林感

戴婺源縣志

汪逢年婺源拔貢由教習知鉅野縣邑多積逋賊盜滋熾逢年設方略緝剿捐俸償逋有豪右為害廉其惡置之法邑稱神君

婺源縣志

余光魯婺源拔貢知石城縣耿逆方熾縱麾下剝斂威奪民婦光魯繩之以法總督范承勳稱為治平第一後補富順令當獻

賊荼毒之餘招集流亡懷保惠鮮興學課士民氣以蘇婺源縣志

吳文炳婺源貢生由教習分發河南知原武縣地瀕大河自白

馬營決口城垣學宮盡圯田變斥鹵丁糧如故文炳次第興築

捐俸置牛種課耕植其田不可復者詳請豁免復倡義田置普

濟育嬰二堂升知新興州以老乞歸婺源縣志

吳苑字楞香歙縣人康熙壬戌進士選庶常授檢討歷中允侍

講遷祭酒奏請諸教習官學者補縣令勿補州倅以通沈滯塞

倅門又嚴試補教習之法又令八旗子弟在官學者一體考校

鄉會試量增其額以示鼓勵省親告歸著有北黟集江南通志

張瑗字松巖祁門人康熙辛未會元授翰林編修主試四川改

御史明閩魏忠賢墓在西山侈甚上疏請毀之報可朝野以為

快提督河南學政瑗賦性淡泊素履端詳居官以廉謹稱江南通志

方觀欵縣人江都籍康熙己丑進士由翰林累遷戶科給事中

雍正六年擢浙江按察使嘗謂盜之不弭吏為之市也嚴地方

抑勒諱匿之禁絕捕役養餼贓之弊設窩藏科別懲創之條

盜遂衰止遷西安布政使扶病就道至六合卒於途

贈太常寺卿給治喪銀五百兩浙江通志

吳肇榮婺源貢生考授東昌府同知三攝府篆治績有聲

聖祖仁皇帝東巡籌辦盡職升任常德地值凋瘵拊循振刷百廢具舉

後知安陸郡當下流恃庇長隄榮親臨葺築終任無水患婺源縣志

趙繼忭字鶴皋休甯人康熙己丑進士以主事改伏羌知縣時

西路出軍邑當孔道往來供億絡繹浩繁繼忭禁苛派纖悉不

以累民歲饑不待請而發廩以賑計口造冊親引赴倉領粟胥

役無侵歡聲溢道上官廉得其狀深獎異之擢署蘭州休甯縣志

汪榘字亭立休甯人康熙壬辰進士知同官縣時委辦軍需例

以十月開徵臘月起運逾限則罪且不測吏以嚴比告榘不聽

集里老於庭而告之以軍限曰吾不惜一官而重笞吾民顧吾

去而來者必鑒吾失柰何里老羅泣甫而糧具歷官至戶

科給事中乾隆元年疏請江南鄉試增解額以示鼓舞得如所

請增二十名載入科場條例休甯縣志

江永玠歙縣人以郎中擢兩浙驛鹽道在戶部時秦中大饑奉

旨發粟往賑路出中州需車腳四萬餘金議者欲派之民間玠不可遂

止台州舊有朱子金清港閘圯久未修捐金力籌興復又濬築

臨海社瀆場之三溝六壩郡東之河渠皆有關水利歙縣志

畢萬鍾歙縣人由大同經歷升知宜陽縣在大同值旱荒力請

賑濟口外亦饑從知府出關竭力撫恤復奉檄安集雁門等處

流民全活甚眾宜陽故瘠土明末寇燹凋傷更甚撫循軫恤知

無不為洛水漲潦造舟以濟行旅築隄捍防民乃奠居歙縣志

吳元弼休甯人錢塘籍以廩貢官浦江教諭升濬江知縣後補

平樂升知隰州服官三十年修浦江學宮築濬江河隄創平樂

社學革監利私關均大甯賦丁糧政聲卓然稱循良云休甯縣志

程國棟字玉亭休甯舉人歷知嘉定鹽城沛范滕諸縣皆有惠

政鹽城東連海西接黃淮河隄屢潰射陽湖淤不利洩棟上計

於河使者陳三大工一疏東界河使泰興之水由大蹤河歸新
洋入海一疏西鹽河東塘河使高寶之水由射陽湖入海一疏
北穿場河及廖家港院道港以溉一百二十里從古無河之高
田且引汙河水直達射陽湖入海使者奏請行之遂爲七邑永
利壬戌河決古溝橫溢下河棟以海上天妃石礎上岡草堰四
閘計其金門十五丈二尺不能當西來異漲乃開天妃閘旁越
河八丈以殺其勢又開范公隄一百餘丈助洩之或以工大宜
詳請棟曰事急違待報乎捐俸成之水果平棟所在講求水利
遇災輒請賑或格不行則憂形於色所至人懷其惠而鹽人德
之尤深至今尸祝之

休甯縣志

程世綏休甯舉人知靈寶縣題授陝州捐廉平硤石張茅險徑
墾荒地三千八百餘畝給平民修水利旋升東昌府擢湖北驛

鹽道遷甘肅布政使以兄世繩卒於京山任悲不能已遂告歸

休甯縣志

趙道元休甯人官平鄉知縣當漳滏交流漳南徙而溢漲涸
不時舊建利民六閘以啟閉水旱無虞年久傾圮道元至連歲
遇旱乃蒐訪利弊捐俸重修六閘復於河東相其地勢添建二
閘灌地萬餘畝又於中流建閘二座停蓄水勢工匠木石之費
一不擾民設閘長以時啟閉議條約以杜爭端又於江淮雇募
良工製造水車以佐水所不及爲其地民所未睹於是灌漑不
勞而水利足至今民尸祝之

休甯縣志

程師爽休甯貢生選德安通判郡有營弁竊盜吏莫敢發爽捕
而置之法又殫私資築隄以禦天門水災監賑漢陽蠹吏侵漁
立懲奸胥親自給發後道出廣濟遇寇其首前曰莫非昔年監

賑漢陽者乎立揮其徒以去

休甯縣志

金宏勳休甯人桐鄉籍以薦分發四川攝雙流縣向時打箭鑪餉皆雙流長運力請改途嘉定白雅河水運公私便之補安岳

縣縣治新創山箐多盜嚴立保甲盜悉解散再補涇縣以卓異

擢壽州官至汀州府

休甯縣志

按宏勳既補官安徽不得為休甯人矣舊志沿商籍例收之未細審耳

金烈歙縣人歷官吏部文選司郎中倣唐長名榜式先期注擬

班次瞭然銓政一清擢廣東惠潮嘉道捐俸築海陽蔡家圍隄

水患以息惠屬龍川和平二邑為江西定安下游商人欲便運

販謀開大渠從贛南當事請於制府烈馳赴相度謂此渠一開

則龍河俱壑繪圖陳利害力言不可事得寢

休甯縣志

程鑾字坡士歙縣廩貢官工部主事歷郎中出為全浙督糧道

值歲祲閣臣黃蓋奉

旨發常平散賑而各屬倉廩皆虧無不束手鑾獨慨然身任召諸老吏

授以重資分路告糴剋期畢會全活無算使者入告

上特賜御書聯句及彩緞實外吏未有之殊榮嘉杭湖三郡漕糧數繁

弁丁積弊往往牽累有司鑾悉發其奸更招遠商以平米價設

粥糜以活饑民捐修學宮葺文信國祠政績皆卓然可紀

歙縣志

程崧字夔州鑾之弟也康熙癸巳進士授刑部主事臺灣朱一

貴肆逆官棄城者多論法崧研核精詳毋縱毋刻堂官每虛己

從之升員外遷郎中時有惠安童生罷考案議照河南王遜例

立決崧謂罷考同而所由罷考不同河南以派夫撓國法惠安

以禁夜忤典史偕同官包濤力爭得減

歙縣志

汪理祁門人康熙壬子選貢知衡水縣時邊警有牧馬之役理

一芻一粟不以擾民常例積弊概行詳罷調新和革陋規剔奸

弊及解組歸士民祖餞數十里不絕祁門縣志

程子璋歛縣人官廣東開建知縣大金山有豪猾黃某役民採金而收其利值大力者奪之黃遂招致海寇盤踞山中四出劫掠子璋團練鄉兵禦之復書榜示脅從者令其來歸有歸者又勸其建功贖罪於是自相攻擊渠魁授首歲饑不待請而開倉平糶全活饑民無算歛縣志

程子琨歛縣人官岳州府通判岳濱洞庭盜賊藪集湖南糧艘在岳盜匿其中吏莫敢問子琨禁商船夜行停泊處嚴行防護立湖船保甲法盜用衰息嘗單騎夜巡獲積盜徐三及周大見王麻子等歛縣志

凌如煥字榆山歛縣人由進士官侍講視學湖北歷內閣學士時方議開墾河東如煥疏言報墾之時不過濫邀議敘升科以

後必至飛派民田國家宜體寬賦之仁杜言利之漸乾隆初渾水大發遣如煥巡視奏言畿輔地近幸得早聞他省郵書稽遲請令有司得便宜行事後晉兵部左侍郎以乞養歸歛縣志

汪由敦字謹堂休甯人雍正元年以諸生薦充明史館纂修明年三月舉順天鄉試八月成進士選庶常授編修由宮坊講讀晉卿貳

簡侍禁廷擢禮部侍郎授工部尚書轉刑部入直軍機處平定金川敘功加太子少師協辦大學士以代原任大學士張廷玉奏事革職畱尚書任會四川學政朱荃以墨敗由敦坐薦荃典試復革職仍理兵部侍郎事自贖補戶部右侍郎奉

命勘永定河時有言宜別開新河歸海者由敦徧歷沿河州郡議以暴水為患由河身淤淺第濬之當自息宜仍舊便奏上

報可授工部尙書加太子太傅轉刑部敘平準噶爾功加三級自準噶

爾出師以來由敦偕同事諸臣晨夕進見日數四或扈從

召對帳殿亦如之轉工部尙書又轉吏部卒於官年六十七加

贈太子太師諡文端入賢良祠由敦爛於歷代掌故前後考定樂章祭

器鹵簿及朝會升耐諸大禮皆斟酌古今釐然爲一代之制雖

以文學受

知而簿書錢穀刑名之事亦無不究心焉有詩文集各五十卷兼工書

法爲學者楷模一統志休甯縣志

黃文煒字飛赤歙縣拔貢雍正五年自韶州府調任高州廉明

嚴斷禮士愛民畱心學校學宮祭器樂器舊多殘缺悉爲補置

蒞治數月頌聲四作郡人比之黃潁州後升兩湖鹽法道旋擢

臬司廣東通志新墾

朱陵字紫岡歙縣人雍正甲辰進士選庶常歷官監察御史出

爲贛州知府分巡贛南贛當閩粵之衝有東西兩關委陵兼攝

一清吏胥之弊令諸商自注稅銀於簿法寬而課自裕調辰沅

永靖道歙縣志

許起昆字玉載歙縣人以薦發河東試用署蒲臺縣首正偪嫁

寡婦之俗移署利津三年內請賑請蠲請緩徵請平糶不一而

足催科收漕清而能嚴吏胥無所施其巧溝渥久湮親爲疏濬

力行保甲之法使姦盜無所容卒於署士民哭之慟歙縣志

洪璟歙縣拔貢教習知交城縣設義學修盧川書院薛公祠捐

俸築北郭外臥虹隄長八十餘丈邑無水患升大同知府猾吏

斂迹民困以蘇歙縣志

汪守魯歙縣人選授陝西甘肅行都司斷事舊俗不事耕桑不

